



UKA 2018/173
17. oktober 2018
Aqqaluk Heilmann

Misiliilluni aningaasaliineq nunaqarfinni qerititsivinnik sanaartornissamik annertusaanissamullu tapiisarnerni periutsit pissutsillu pitsaanerpaat anguniarlugit qanoq aaqqiivigineqarsinnaanera pillugit Inatsisartut Naalakkersuisut nassuiaasioqqullugit peqquneqarnissaanik aalajangiiffigisassatut siunnersuut. Nassuiaasiornermi isumalluutit suliffissaqartitsinerit kiisalu aningaasaqarnermut tunngasut kommunit, inuussutissarsiornermik ingerlatsisut aammalu KANUNUPE-p misilittagaat ilaatigut ilanngunneqassapput. Nassuiaat Inatsisartunut agguanneqassaaq, tamatumani nassuiaatip inerniliineri AIS20-imut ilanngullugit suliarineqarsinnaalerlugit.

(Inatsisartuni ilaasortaq Peter Olsen, Inuit Ataqtigiit)

Nunatsinni inuppassuit najunga qarput nunaqarfinni, illoqarfissuurtut suliffissarpassuaqarfimmiittuunatik, kisiannili amerlanersai imaani inuussutissarsiortuullutik aalisarnikkut nunatta aningaasaqarneranut annertuumik iluaqutaasumik.

Pissusissamisoorpoq aalisarnikkut atungarisaat eqqarsaatigalugu inerisarneqarnissaat minnerunngitsumik ukioq kaajallallugu tunitsiveqartinneqarnissaat.

Atassummiit isumaqarpugut inuiaqtigiit pigisaat Royal Greenland aningaasartuutissatigut kisiat nammattuutissallugu isumalluutigineqarsinnaanngitsoq, taamaattumik qerititsiviit eqqarsaatigalugit iliuseqarsinnaaneq tapersersugassaavoq.

Qaleralinniat eqqarsaatigigaanni nunaqarfinni sumiiffiit ilai ukiukkut qaammat februar ingerlatiliinnartoq qerititsivimminnik ulikkaartoornikkut unittoortarput, aatsaallu umiarsuit tikiuteqqinnerisigut imaajarneqareeraagamik ammaqqissinnaalertarlutik.

Umiarsuarnillu utaqqineq sikusartumi najugalinnit oqitsuinnarmik atorneqarneq ajorpoq.

Nunatsinni najunga qartut kikkulluunniit takorloorsinnaavaat qaammat februarip ulluisa atugassaritittagai qanoq imaannaanngitsigisinnaasartut nunatsinni silap atugassarititaani peqqarniissinnaasartutut nalilerniarneqartartumi.

Taamatut qerititsivinnik ulikkaartoortoqaraagat allatut ajornartumik aalisartut ilai nussortariaqarallartarput nunaqarfinniit nunaqarfinnut, taamaaliortariaqartarlutik meeqqaminnik ikiugaqarnertik nerisassaqarnitit allatigullu akilersuisuunertik ingerlaannassappata.



Ajoraluartumilli tamarmik taamaanngillat. Ilaqartarput nuussinnaanngikkallartunik meeqqami atuarneri tassani nunaqarfimminni allannguisinnaanngitsuni kiisalu nunaqarfimmut allamut pigallarnissaminut inissaqanngitsuni.

Kingunerisarpaalu ikiortariaqalertarnitik aalisarnermik inuussutissarsiutimi unikkallarnerani.

Nunarput tamaat isigalugu aamma taamatut ippoq nunatta kujataani, aalisarnermi tunitsiveqarniarnikkut atungassarititaasuni unammilligassaqartarluni.

Tunu immikkut isiginiarneqartariaqarnera annertuumillu iliusseqarfiginiartariaqarnera ilanngullugu taarusuppara.

Tassani piffimmi umiarsuit ukiumut qasseriarlutik orniguttarnerat immikkut isiginiarneqartariaqapoq, umiarsuit qerititsivinnik imaajaasinnaaneri eqqarsaatigalugit qerititsiviit amerlassusilerneqarneqarannik tunngavissiisariaqarami.

Taamatut ipput aamma tunitsiviit ilai isorliunerusuni sikusartumi aalisartoqarfinni, qaammat februar aallartilaaginnartoq qerititsivinnik ulikkaartoortarlutik, naak aalisapiluttoqanngikkaluarluni, tassa qerititsiviit mikivallaarneri pissutaanerullutik.

Siunissaq ungasinnerusiq kisimi eqqarsaatissaanngilaq, nunatta karsiata annertuumik iluaqutigisinnaavaa ukioq kaajallallugu aalisartut tunitsivissaqartissinnaanerat. Inuillu imminnut pilersornerusinnaanissaannut aqutissiuussisoq.

Tamannalu niueqatigiinnikkut sillimaffigineqartariaqarpoq ilanngullugu aalisakkap nunatsinniit anninneqarnermini nalingisa nunatta karsianut tuttussat annertuseriarsinnaanerat soqutigisariaqarparput avammut niuernikkut akornutaanngitsumik.

Una siunnersuut qerititsivinnik sanaartoqqusinermik peqqusinerunngitsoq ilisimallugu, kisiannili Naalakkersuisunik nassuiaasioqqusummik imalik soqutiginarillugu tapersernartipparput. Paaserusupparpummi periarfissat qanorpiaq ittuunersut, aalisarfiusunullu qanoq sunniuteqassanersoq.

Taamaattumik Atassummiit kaammattuutigerusupparput nunarput tamakkerlugu sumi qerititsiviliisinnaanerit tulleriissaartumik ingerlanneqarsinnaanerat ilangullugu nalilersorneqartussatut tusarniaasutigineqarnissaa.

Taamatut pilersuinissamut pisariaqartinneqarsinnaasut ilanngullugit sillimaffigineqartariaqarput pisariaqartitsippatalu iliuuseqarfigineqarsinnaasariaqarput, soorlu nukissiutit qerititsivinnik sarfamik naammattumik pilersuisinnaasut, pingaartumik nunaqarfinni mikisuni.

Taamatut siunnersuut oqaaseqarfigalutigu taperserparput, ataatsimiititaliamullu susassaqartumut innersuullutigu.